



REPUBLIKA E KOSOVËS / REPUBLIKA KOSOVA

CN.nr.115/2024

GJYKATA SUPREME E KOSOVËS, kolegji i përbërë nga gjyqtarët: Zenel Leku, kryetar, Muhamet Rexha dhe Nenad Lazic, anëtarë, në çështjen juridike përmbartimore të kreditorit Ministria e Punës dhe Mirëqenies Sociale - Trupi Ekzekutiv i Inspektoratit të Punës, me seli në M., kundër debitorit N.T.N. “T - D”., me seli në M., me objekt kontesti borxh, përkitazi me konfliktin e kompetencës, në seancën e kolegjit të mbajtur më 11.03.2024, merr këtë:

A K T V E N D I M

Për të gjykuar në këtë çështje juridike kompetente në pikëpamje lëndore është Gjykata Themelore në Mitrovicë, Departamenti i Përgjithshëm, të cilës shkresat e lëndës i dërgohen në kompetencë të mëtejme.

A r s y e t i m i

Gjykata Themelore Mitrovicë, duke vepruar sipas propozimit të kreditorit Ministria e Punës dhe Mirëqenies Sociale - Trupi Ekzekutiv i Inspektoratit të Punës, me aktvendimin E.nr.830/13 të datës 19.11.2013, ka lejuar përmbartimin ndaj debitorit N.T.N. “T- D”., për ekzekutimin e borxhit në lartësi prej 1800 €.

Ndaj këtij aktvendimi debitori ka paraqitë kundërshtim, ndërsa Gjykata Themelore në Mitrovicë, me aktvendimin CP.nr.830/13 të datës 16.06.2014 ka refuzuar kundërshtimin e debitorit si të pabazuar, ndërsa e njëjta gjykatë me aktvendimin CP.nr.830/2013 të datës 24.07.2023 në pikën I të dispozitivit është shpallur jo kompetente në pikëpamje lëndore për të vendosur në këtë çështje

juridike, ndërsa në pikën II të dispozitivit është vendosur që pasi ky aktvendim të marr formën e prerë, lënda i dërgohet Gjykatës Komerciale në Prishtinë për veprim të mëtejshëm.

Gjykata Komerciale e Kosovës, Dhomat e shkallës së parë, Departamenti për Çështje Ekonomike me aktvendimin KPPP.nr.1516/23 të datës 29.01.2024, në pikën I të dispozitivit ka vendosur që të hapë konflikt kompetence në mes të Gjykatës Komerciale të Kosovës, Dhomat e Shkallës së Parë, Departamenti për Çështje Ekonomike dhe Gjykatës Themelore në Mitrovicë, për të vendosur në çështjen juridike përbarimore në mes të kreditorit Inspektorati i Punës dhe debitorit N.T.N. “T - D”., Në pikën II të dispozitivit është vendosur që për të vendosur lidhur më konfliktin e kompetencës lënda i dërgohet Gjykatës Supreme të Kosovës.

Gjykata Supreme e Kosovës, ka vlerësuar se në këtë rast kemi të bëjmë me konfliktin e kompetencës midis gjykatave të ndryshme të cilin e zgjidh Gjykata Supreme e Kosovës, bazuar në nenin 25.2 të LPK-së dhe nenin 13 pika 7 të Ligjit Nr.08/L-015 Për Gjykatën Komerciale.

Nga shkresat e lëndës rezulton se kreditori, Ministria e Punës dhe Mirëqenies Sociale - Trupi Ekzekutiv i Inspektoratit të Punës, me seli në Mitrovicë, më datë 01.11.2013 ka parashtruar propozim për përbarim në Gjykatën Themelore në Mitrovicë, me të cilin ka kërkuar që të detyrohet debitori N.T.N. “T- D”., me seli në M., që t’ia paguaj shumën prej 1800 €. Gjykata ka lejuar propozimin për përbarim të paraqitur nga kreditori, ndërsa me aktvendimin CP.nr.830/13 të datës 16.06.2014 ka refuzuar kundërshtimin e debitorit si të pabazuar. Gjykata Themelore në Mitrovicë, ka nxjerrë aktvendimin CP.nr.830/2013 të datës 24.07.2023, me të cilin është shpallur jokompetente në pikëpamje lëndore dhe lëndën ia ka dërguar Gjykatës Komerciale të Kosovës për vendosje.

Gjykata Supreme e Kosovës vlerëson se në këtë çështje juridike me kompetencë lëndore për të gjykuar është Gjykata Themelore në Mitrovicë, për këto arsye:

Me nenin 1 të Ligjit për Procedurën Përbarimore, përcaktohet se: *“Ky ligj rregullon procedurën përmes së cilës Gjykatat dhe përbaruesit privat përcaktojnë dhe zbatojnë përbarimin në bazë të dokumenteve përbarues dhe dokumenteve të besueshme, përveç nëse me ligj të veçantë parashihet ndryshe.”* Me nenin 12 paragrafi 1 të Ligjit për Gjykatat nr.06/L-054, i shpallur në Gazetën Zyrtare nr. 22, datë 18 dhjetor 2018, parashihet që: *“Gjykatat themelore janë kompetente për të gjykuar në shkallë të parë të gjitha çështjet, përpos nëse me ligj parashihet ndryshe”.* Me

nenin 13 paragrafi 1 të Ligjit për Gjykatën Komerciale, përcaktohet se: “Gjykata Komerciale është kompetente për të gjykuar, dhe ka juridiksion ekskluziv për të gjykuar, në Dhomat e Shkallës së Parë dhe Dhomat e Shkallës së Dytë: 1.1. kontestet ndërmjet shoqërive tregtare vendore dhe të huaja, si dhe kontestet ndërmjet personave juridikë publikë dhe privat, në lidhje me çështjet e ndërsjella tregtare dhe çështje tjera mes tyre, dhe 1.2. të gjitha mjetet juridike, siç përcaktohet me ligjin e aplikueshëm për procedurën përmbartimore, për çështje brenda kompetencës të kësaj gjykate”.

Gjykata Supreme vlerëson se në këtë rast me kompetencë lëndore për të vendosur në këtë çështje juridike-përmbartimore është Gjykata Themelore në Mitrovicë, Departamenti i Përgjithshëm, për faktin se debitori në këtë çështje përmbartimore kur është lejuar përmbartimi dhe lënda ka qenë në Gjykatën Themelore në Mitrovicë, edhe pse ka paraqitur kundërshtim, kundërshtimi është refuzuar si i pabazuar me aktvendimin CP.nr.830/13 të datës 16.06.2014, pra për kundërshtim është vendosur me aktvendimin e lartcekur të Gjykatës Themelore në Mitrovicë, e po ashtu e njëjta gjykatë me shkesën e datës 16.07.2014 ka kërkuar sigurimin e kontos - numrin e xhirollogarisë për debitorin, për të përfunduar procedurën në këtë çështje. Pasi që në rastin konkret nga palët nuk ka ankesë, e as kreditori nuk ka kërkuar që lënda të kaloj te përmbartuesi privat ashtu siç është përcaktuar me nenin 397 të LPP-së, andaj Gjykata Themelore në Mitrovicë, mbi bazën e këtyre rrethanave nuk ka mundur të shpallet jo kompetente në pikëpamje lëndore por është dashur të vazhdoj në trajtimin e rastit.

Gjykata Supreme e Kosovës, pas shqyrtimit të shkesave të lëndës e bazuar në dispozitat e lartcekura, gjeti se gjykatë me kompetencë lëndore për të vendosur sipas propozimit për përmbartim është Gjykata Themelore në Mitrovicë, Departamenti i Përgjithshëm.

Nga sa u tha më lart, e në kuptim të dispozitës së nenit 25.2 të LPK, u vendos si në dispozitiv të këtij aktvendimi.

GJYKATA SUPREME E KOSOVËS – PRISHTINË

CN.nr.115/2024, datë 11.03.2024

Kryetari i kolegjit - gjyqtari
Zenel Leku